



TOSHKENT DAVLAT YURIDIK UNIVERSITETI REKTORINING B U Y R U G ' I

28.10.2022

333-um-son

Toshkent davlat yuridik universitetida klub va doimiy loyihalar faoliyatini samarali tashkil etish to'g'risida

Toshkent davlat yuridik universitetida talabalarning egallagan nazariy bilimlarini yanada mustahkamlash, intellektual salohiyatlarini oshirish, iqtidorlarini qo'llab-quvvatlash hamda bo'sh vaqtlarini mazmunli tashkil etish maqsadida bir qator tizimli ishlar amalga oshirilib kelinmoqda.

Jumladan, universitet boshqaruvida hamda ta'lim va tarbiya jarayoniga oid muhim qarorlar qabul qilishda talabalarning fikri inobatga olinib, bu borada tashkil etiladigan ishchi guruhlar tarkibining yarmi talabalardan iborat tarkibda shakllanishiga e'tibor qaratilmoqda. Talabalarda o'zini-o'zi boshqarishning mexanizmini joriy etish maqsadida Talabalar assotsiatsiyasi faoliyati yo'lga qo'yildi, "talaba-talabaga ko'makchi" shiori ostida mentorlik tizimi joriy etilib, talabalarning umumiy harakatiga aylantirilmoqda, bir qator ilmiy maktablar, klublar, to'garaklar hamda loyihalar faoliyati yo'lga qo'yilib ular orqali talabalarning bilim darajasini oshirish, universitet maqsad va vazifalarini singdirish, ularning bo'sh vaqtlarini mazmunli tashkil etishga e'tibor qaratilmoqda.

Bu boradagi ishlarni tizimli tashkil etish, yoshlar bilan ishlash va ma'naviy-ma'rifiy yo'nalishdagi ishlarni tizimlashtirish, O'zbekiston Respublikasi Prezidentining 2020-yil 29-apreldagi PF-5987-son "O'zbekiston Respublikasida yuridik ta'lim va fanni tubdan takomillashtirish bo'yicha qo'shimcha chora-tadbirlar to'g'risida"gi Farmonida belgilangan vazifalar ijrosini ta'minlash hamda universitetda Yoshlarga oid davlat siyosatini samarali tashkil etish maqsadida

BUYURAMAN:

1. Toshkent davlat yuridik universiteti (bundan buyon matnda – Universitet)da klub va doimiy loyihalar faoliyatini samarali tashkil etilishiga alohida e'tibor qaratilishi belgilab o'tilsin.

Bunda faoliyatning ustuvor yo'nalishi sifatida quyidagilarga a'lohida

e'tibor qaratilsin:

birinchidan, talabalarni "Universitetsiz kunimni tasavvur eta olmayman" degan maqsad ostida birlashtirish va universitet ijtimoiy hayotidagi ularning faolliklarini oshirish;

ikkinchidan, talabalarda "Ijtimoiy faollik indeksi"ni ishlab chiqish orqali ularning faolliklarini rag'batlantirib borish;

uchinchidan, talabalar o'rtasida ular uchun foydali bo'lgan klub, to'garak va loyihalar faoliyatini samarali yo'lga qo'yish, o'zini-o'zi boshqarish tizimlarini joriy etish orqali universitet maqsad va vazifalarini tizimli singdirib borish;

to'rtinchidan, talabalarda tanlagan kasblariga bo'lgan muhabbatni oshirish, kasb etikasini shakllantirish orqali sog'lom va to'g'ri fikrlaydigan, halol va fidoiy kadrlarni shakllantirish;

beshinchidan, faoliyatni elektronlashtirish orqali ortiqcha hujjatbozchilik va sarsongarchiliklarning oldini olish, talabalarining ijtimoiy faolliklari bo'yicha yagona bazasini shakllantirish;

oltinchidan, klub va loyiha koordinatorlarini munosib rag'batlantirish tizimini yaratish orqali ijtimoiy faol talabalar safini kengaytirish;

yettinchidan, xalqaro va milliy musobaqa hamda tanlovlarda talabalarni tizimli tayyorlash orqali universitet nufuzini oshirishga erishish;

sakkizinchidan, aholining huquqiy bilimlarini oshirish hamda ularga kundalik hayoti uchun zarur bo'lgan keng ahamiyatli loyihalarni joriy qilish orqali talabalarda fuqarolar bilan ishlash ko'nikmalarini shakllantirish.

2. Universitet ijtimoiy hayotida faol bo'lgan talabalar sonini oshirish borasida quyidagicha tartib joriy etiladi:

talabalardan yangi takliflar, fikr-mulohazalar va takliflarni olish va ularni universitet ijtimoiy hayotiga joriy qilish maqsadida qoida tariqasida **har oyda bir marotaba** "Eng yaxshi g'oya" tanlovlarini o'tkazib borish amaliyoti joriy etilsin;

universitetda faoliyati yo'lga qo'yiladigan klub, to'garak va loyihalar Ma'naviyat va ma'rifat markazi tomonidan ro'yhatdan o'tkaziladi;

klub, to'garak va loyihalar haqida ma'lumot olish, ularga a'zo bo'lish, mashg'ulotlarida ishtirok etish to'liq digital.tsul.uz platformasi orqali elektron tarzda tashkil etiladi, ushbu platformada ularning yutuqlari to'liq aks ettiriladi va ijtimoiy faolliklarining reytingi yuritiladi (*qoida tariqasida platformadan ro'yxatdan o'tmagan talabalarining loyihalarda ishtiroki hisobga olinmaydi*);

2022/2023-o'quv yilining ikkinchi semestrndan boshlab klub, to'garak va loyihalarining faoliyatini yaxshi yo'lga qo'yib kelayotgan koordinatorlar komissiya xulosasiga ko'ra har oyda talabalarni rag'batlantirish jamg'armasi mablag'lari hisobidan bazaviy stipendiyaga nisbatan 50 foizgacha miqdorda belgilangan tartibda rag'batlantirilib boriladi;

har o'quv yili so'ngida universitet maqsad va vazifalarini talabalar orasida faol singdirgan, uning nomini xalqaro va respublika miqyosida keng targ'ib qilgan, loyihasi talabalarining bilim va ko'nikmalarini oshirishga va keng

qamroviga xizmat qilgan koordinatorlar **“Eng yaxshi loyiha”** nominatsiyasi bo'yicha bazaviy stipendiyaga nisbattan 10 barobarigacha rag'batlantiriladi;

klub, doimiy loyiha va tanlovlar uchun zarur moddiy-texnik vositalar, ularning faoliyat samaradorligi uchun sarflanadigan xarajatlar (kiyim-kechak, tarqatma materiallar, sovg'a (Gift box)lar, universitet va loyiha belgisi tushurilgan bayroqlar, blaknot va ruchkalar, safar xarajatlari) universitet hisobidan moliyalashtiriladi.

3. Quyidagilar:

Toshkent davlat yuridik universitetida klublar faoliyatini yo'lga qo'yish hamda ro'yxatdan o'tkazish tartibi to'g'risidagi nizom 1-ilovaga;

Klub, to'garak va loyiha koordinatorlarining faoliyatini “Eng yaxshi loyiha” nominatsiyasi bo'yicha baholash me'zonlari 2-ilovaga;

Talabalarining “Ijtimoiy faollik indeksi”ni baholash mezonlari 3-ilovaga;

Klub, to'garak va loyiha koordinatorlarining faoliyatini baholash, ular o'rtasida o'tkaziladigan “Eng yaxshi loyiha” nominatsiyasini baholash hamda talabalarining “Ijtimoiy faollik indeksi”ni belgilash bo'yicha komissiya tarkibi 4-ilovaga muvofiq tasdiqlansin.

4. Universitet talabalarining "Ijtimoiy faollik indeksi" natijalariga ko'ra rag'batlantirib borish (moddiy va ma'naviy rag'batlantirish, qo'shimcha kreditlar ajratish va hokazolar) mexanizmlari 2022/2023-o'quv yili 2-semestriddan boshlab joriy etiladi.

5. O'quv-uslubiy boshqarma (Registrator ofisi) (S.Bozorov), Ma'naviyat va ma'rifat markazi (Sh.Po'lotov), Buxgalteriya (M.Parpiyev) 2022-yilning 15-dekabr sanasiga qadar O'zbekiston yoshlar ittifoqi boshlang'ich tashkiloti hamda Talabalar assotsiatsiyasi faollari bilan birgalikda talabalarini "Ijtimoiy faollik indeksi" natijalariga ko'ra rag'batlantirish bo'yicha mavjud tartiblarni atroflicha tahlil qilgan holda taklif tayyorlab taqdim etish choralari ko'rsin.

6. 2022/2023-o'quv yili davomida yoshlar bilan ishlash va ma'naviy-ma'rifiy yo'nalishda o'tkaziladigan tadbirlarning kalendar rejasi 5-ilovaga, sport-sog'lomlashtirish yo'nalishida o'tkaziladigan “Rektor kubogi” musobaqalarining jadvali 6-ilovaga, talabalarda tanlagan kasblariga muhabbatlarini oshirish, bilim olishga va intilishga bo'lgan motivatsiyasini oshirish maqsadida yuridik sohada va davlat boshqaruvida muvofaqqiyatga erishgan mutaxassislar bilan uchrashuvlar o'tkazish jadvali 7-ilovaga muvofiq tasdiqlansin.

7. Universitetda talaba-yoshlarni mamlakatimizda amalga oshirilayotgan barcha sohalaridagi islohotlar, xorijda ro'y berayotgan voqealar hamda boshqa zarur axborotlar bilan tezkor va muntazam ravishda xabardor etib borish maqsadida tyutorlar va malakali professor-o'qituvchilar tomonidan darsdan bo'sh vaqtlarda haftada bir marotaba “Tyutorlik soatlari”ni sifatli tashkil etilishi belgilab o'tilsin.

8. Yoshlar masalalari va ma'naviy-ma'rifiy ishlar bo'yicha birinchi prorektor A.Xashimhonov:

ushbu buyruq bilan joriy etilgan tartib va yangiliklarning mazmun-mohiyatini xodim va talabalar e'tiboriga yetkazilishini nazorat qilsin;

universitetda o'tkaziladigan tadbir, konferensiya va loyihalarni belgilangan tartibda o'tkazilishi barcha mas'ullarga tushuntirsin hamda to'liq nazorat qilsin;

talabalarda "Universitetsiz kunimni tasavvur eta olmayman" degan maqsadni bosh g'oya sifatida targ'ib qilish, talabalarning barchasini universitet ijtimoiy hayotida faol bo'lishini, fanlarni a'lo baholarda o'zlashtirishini tizimli targ'ib etib borilishini nazoratga olsin;

ushbu buyruq bilan joriy etilayotgan tanlovlarni hamda baholash tartiblarini ochiq-oshkora va shaffof tarzda tashkil etilishini ta'minlasin;

davlat stipendiyalari, xalqaro va respublika miqyosida o'tkaziladigan fan olimpiadalari hamda boshqa tanlovlar va loyihalarda talabalarning munosib ishtirok etishlarini ta'minlash maqsadida ularni 1-kursga qabul qilinganidan boshlab tayyorlash, ular orasida tizimli targ'ib qilib borish tizimini joriy etsin hamda malakali professor-o'qituvchilarga biriktirish choralarini ko'rsin;

talabalarni tanlagan kasblariga bo'lgan qiziqishlarini yanada oshirishga qaratilgan loyihalarni amalga oshirish, shuningdek ularni ilmiy ijodiy faoliyatga qiziqtirish maqsadida tashkil etilgan klub, loyiha, to'garak va ilmiy maktablar faoliyatiga talabalarning ixtiyoriy ishtirok etishlarini keng targ'ib qilinishini nazoratga olsin;

chora-tadbirlar rejasida belgilangan vazifalar ijrosini o'z vaqtida va samarali amalga oshirilishi, bu jarayonlarda professor-o'qituvchilar, tyutorlar va ayniqsa faol talabalarni keng jalb etish choralarini ko'rsin;

talabalarni universitet hayotiga keng jalb qilish, faolliklarini oshirish, universitet maqsad va vazifalarini singdirish borasida tyutorlar, Talabalar assotsiatsiyasi, O'zbekiston yoshlar ittifoqi boshlang'ich tashkilotining hamkorlikdagi o'rnini oshirish choralarini ko'rsin;

tyutorlarning faoliyat samaradorligini oshirish borasida ular uchun turli seminar-treninglar, o'quvlar tashkil etish, zarur qo'llanmalar bilan ta'minlash choralarini ko'rsin.

9. Ma'naviyat va ma'rifat markazi (Sh.Po'lotov) hamda Elektron universitet bo'limi (A.Karimov):

bir hafta muddatda digital.tsul.uz platformasida klub, to'garak va loyihalar haqida ma'lumot olish, ularga a'zo bo'lish, mashg'ulotlarida elektron ishtirok etish, talabalarning yutuqlarini monitoring qilib borish ishlarini yakunlab, talabalar e'tiboriga havola etish choralarini ko'rsin;

belgilangan joylarda tadbir va loyihalarni o'tkazish bo'yicha elektron jadvalni shakllantirish choralarini ko'rsin (elektron jadvalda o'tkaziladigan tadbirlar va belgilangan xonalar universitetning barcha xodimlarida ko'rinib turadigan imkoniyati yaratilishini nazarda tutsin);

o'tkaziladigan tadbirlar, loyihalar yuzasidan tayyorlanadigan qisqa rolik, posterlar, infografikali rasmlarni universitetda mavjud monitorlarda bir xilda

joylashtirib, ularni bir joydan boshqaradigan tizim yaratish choralarini ko'rsin.

10. Universitetda mavjud klub, to'garak va loyihalar yuzasidan talabalarga batafsil ma'lumot berish, ularni a'zolikka qabul qilish maqsadida 2022-yilning 26-27-oktabr kunlari "Loyihalar yarmarkasi" tashkil etilsin.

11. Ma'naviyat va ma'rifat markazi (Sh.Po'lotov):

yarmarkani yuqori saviyada tashkil etish choralarini ko'rsin;

Jamoatchilik va OAV bilan aloqalar bo'limi (J.Haydarov) bilan birgalikda universitetda mavjud klub, to'garak va loyihalar faoliyati yuzasidan ta'sirchan roliklar, infografikalar tayyorlab ularni ijtimoiy tarmoqlarda hamda universitetda o'rnatilgan monitorlarda joylashtirish, yarmarka jarayonlarini OAVlari orqali keng yoritish choralarini ko'rsin;

fakultet dekanlari bilan birgalikda yarmarka faoliyati, unda ishtirok etish bo'yicha talabalar orasida tushuntirish ishlarini olib borsin;

Buxgalteriya (M.Parpiyev) bilan birgalikda yarmarka o'tkaziladigan joylarni, yarmarka mazmun-mohiyati bo'yicha bezatish choralarini ko'rsin;

yarmarkada ishtirok etadigan klub va loyiha koordinatorlariga zarur targ'ibot va tarqatma materiallarini bir xilda chop ettirib, ularning barchasiga o'z klub va loyihalari faoliyati bo'yicha talabalarga ma'lumot taqdim etishlari va ularni a'zolikka qabul qilishlari uchun teng sharoit yaratish choralarini ko'rsin;

klub va loyihalarni ro'yhatdan o'tkazish tartibi bo'yicha talabalar o'rtasida tushuntirish ishlarini olib borsin hamda ularni ro'yxatdan o'tkazishga ko'maklashsin hamda ularning samarali faoliyat yuritishlari uchun zarur shart-sharoitlar yaratish choralarini ko'rsin;

universitetda faoliyat yuritayotgan klub va loyihalar faoliyati yuzasidan talabalar o'rtasida doimiy e'lonlar olib berib borish, ularning faoliyati yuzasidan roliklar, infografikalar tayyorlab talabalar e'tiboriga yetkazib borish choralarini ko'rsin;

talabalardan yangi takliflar, fikr-mulohazalar va takliflarni olish va ularni universitet ijtimoiy hayotiga joriy qilish bo'yicha "Eng yaxshi g'oya" tanlovlarini o'tkazishga puxa tayyorgarlik ko'rsin;

kalendar reja, sport-sog'lomlashtirish musobaqalarini hamda ushbu buyruq bilan joriy etiladigan tartiblarni, talabalar o'rtasida o'tkaziladigan loyihalarni o'z vaqtida va sifatli amalga oshirilishini ta'minlasin.

12. Fakultet dekanlari ushbu buyruq mazmun-mohiyatini talabalar orasida keng targ'ib qilish, ularning xabardorligini oshirish maqsadida tushuntirish ishlarini olib borish, buyruq bilan belgilangan tartiblarni talabalar hayotiga joriy qilish hamda kalendar reja va sport musobaqalarini o'z vaqtida amalga oshirish borasida Ma'naviyat va ma'rifat markazi bilan yaqindan hamkorlik qilish choralarini ko'rsin.

13. Moliya-iqtisod ishlari bo'yicha prorektor A.Iminov ushbu buyruq bilan belgilangan tartiblar, chora-tadbirlar rejalarini amalga oshirish, klub, loyiha va tanlovlar faoliyati bilan bog'liq jarayonlarda sarf qilinadigan xarajatlarni

universitetning budjetdan tashqari mablag'lar hamda homiylarni jalb qilish orqali qoplash choralarini ko'rsin.

14. Devonxona (X.Abdullayev) ushbu buyruqni barcha mas'ul tarkibiy bo'linmalarga yetkazish choralarini ko'rsin.

15. Mazkur buyruq ijrosini nazorat qilishni o'z zimmamda qoldiraman.

Rektor



A.TASHKULOV

Toshkent shahar

Kiritildi:

Direktor

SH.PO‘LOTOV



Kelishildi:

Yoshlar masalalari va ma‘naviy-
ma‘rifiy ishlar bo‘yicha birinchi
prorektor

A.XASHIMHONOV



Moliya-iqtisod ishlar bo‘yicha
prorektor

A.IMINOV



Talabalar orasida ijtimoiy-ma‘naviy
muhit barqarorligini ta‘minlashga
mas‘ul bo‘lgan rektor maslahatchisi

A.XAKNAZAROV



Bosh buxgalter

M.PARPIYEV



Bo'lim boshlig'i

A.RAXIMOV



yuriskonsult

D.ALIBOYEV



Devonxona mudiri

X.ABDULLAYEV

